


**S**ie du aber finden solt nach ordnung / die leng einer yetlichen geraden Linien / die da auff den Schnecken gesetzt würdt dem thü also / Nym ein circel / setz in mit dem ein fuß in den puncten 12. Vnd den andern in den puncten 1. vnd reyhß von daß rund ober sich / Dar nach setz des circels fuß in den puncten 1. vnd den andern in den puncten 12. von dann reyhß auch rundt ober sich / wo sich dann die zwen runden reyhß durch eynander schneyden / da setz eynn puncten c. Also thü zwischen allen puncten der cyffern in der Schnecken lini / als zwischen 1. 2. vnd 2. 3. 2c. vnd bezeichnen oben die schlus der runden reyhß nach eynander / Als d. e. f. g. 2c. durchs gantz a bc. so went es reycht / So du daß mit geraden Lini zusamen zeuchst / c. d. vnd d. e. vnd f. g. 2c. also durch den gantzen vmb lauff aller büchstaben / so schneyden sie dir ab die gestrackten Linien die da gezogen sind aus den puncten 1. 2. 3. 4. 2c. also durch die andern zall all / So du aber die bletter / die durch die runden reyhß worden sind / füglich mit eym mittel Rys teylen wilt / so reyhß erstlich aus dem puncten c. darnach aus dem puncten d. e. f. g. 2c / geradt Linien gegen dem Centro a. byß auf die Schnecken lini / Also kommen diese ding ordenlich / das sichstu hieunden auffgerissen.

Wie lang nach ordnung die geraden Linien auff der Schnecken Lini seyn sollen.



**S**Orthynn will ich die Schnecken lini eynfach machen / vnd vom Circel reyhß in Centrum a. führen / auch wider bletter dar auff setzen / Aber die geraden Linien / die durch die bletter gezogen werden / stehen anderst / dann die vorgestellten Linien / Erstlich reyhß aus dem centrum a. eyn circel reyhß vnd punctir in mit cyffern wie vor / Aber die auffrecht Lini a. b. damit du vmbher ferst / die zertheyl mit 11. puncten in 12. gleyche felt / Vnd far dann wider mit herumb / wie du vor berichtet bist / vnd punctir die Schnecken lini / byß in Centro a. Also ist diese Lini gemacht vnd zu vil dingen breuchlich / sonderlich ist sie auch zu eynem Bisschoffstab zu brauchen / zu dem müs man jm also thün / Zeuch von dem zircel reyhß / aus dem puncten 6. eyn gerade Lini vnder sich / vnd brauch den halben zircel reyhß / mit der größern zall / zu sambt der Schnecken lini / Aber den andern halben circel / mit der mindern zal / laß aussen / darnach nym ein circel / vñ setz in mit dem